



Terenga 5: Hōtaka 44 – ‘Anō nei / Me te mea nei / Te āhua nei’

He Mihi

Hoki mai anō ki te pātaka reo, ki Ako e tuwhera nei ki te hākerekere e hiakai ana, e hōkaka ana ki te hūnene o haupā. Nō reira, hoake tātou kia hārau ai ō tātau ringaringa ki ngā poa o te pātaka nei, kei ekea tātau e te kōrero, "E mua kaikai, e muri kai huare."

Hei Mahi Whakarongo

E whai ake nei ko tētehi o ngā uri o Raukawa, te au ki te tonga, me ana whakamārama e pā ana ki ana wheako nōna e whakaterere ana i tētehi waka i Te Moana nui a Kiwa.

Anei ngā pātai hei whakautu mā koutou:

- 1) He aha te whakataukī?
- 2) He aha te ngako o te whakataukī?
- 3) He aha te ‘au’ i roto i te whakataukī?

Kia whakarongo ake tātou ki ngā whakamārama a Pakake Winiata.

He Whakamārama

Ki te hiahia koe ki te whakataurite i ētehi āhuatanga e rua, anei ētehi kīanga hei whakamahi māu:

- **Ānō (nei) = Me te mea nei**
E waiata ana te wahine ānō (nei) ko Beyonce ia.
E waiata ana te wahine me te mea nei ko Beyonce ia.
- **Te āhua nei**
Kāore he whakatauritetanga i roto i tēnei kīanga, nā reira e rerekē ana te tikanga i ō ngā kīanga o runga ake nei.
Te āhua nei ka marangai āpōpō.
Te āhua nei kua mutu te hui.

He Mahi Ī-papa

Tuhia he rerenga kōrero hei whakatauiria i te kōrero kei runga i te Īpapa.

...me te mea nei...

Hei Mahi

Whakamāoritia ngā rerenga kōrero e whai ake nei:

1. He's running as if he's being chased.
2. It looks like she's not very happy.
3. You're showing off like you've won already.
4. His voice sounds like a tūi singing in the morning.

Whakautu:

Mahi Īpapa: E noho ana rātou ki te kai, me te mea nei he manuhiri kē rātou.

1. E oma ana ia ānō nei e whāia ana ia.
2. Te āhua nei, kāore ia i te harikoa.
3. E pākiwaha ana koe ānō nei kua toa kē.
4. Ko tana reo ānō he tūi e kō ana i te ata hāpara. / Me te mea nei he tūi e kō ana i te ata.